

Saterdag 28 November

Skrifgedeelte: Jeremia 3:6-18

Fokusgedeelte: Jeremia 3:12b

In die lig is ons ongeregthede duideliker, maar die genade ook nader

Onkunde is saligheid, so lui die bekende Afrikaanse spreekwoord. En in terme van ons teksgedeelte is dit heel relevant. Juda is meer skuldig as haar trouelose suster Israel. En die rede hiervoor is tweërlei. Eerstens behoort Juda van beter te weet. Hulle is die gunsgenoot van God die Vader met die nageslag van Dawid op die troon in Jerusalem. Hulle wandel in die lig van die Here. Natuurlik ontbloom hierdie lig hulle sonde en ongeregthede, en dan kom hulle by die tweede probleem. Hulle keer terug na die Here, maar nie met volle oorgawe nie. Hulle bekering is vals. Dit is wat die toorn van die Here teenoor hulle opwek. Geloof en dan veral die Christelike geloof word vandag gesien as iets wat ekstra bepalings op 'n persoon lê. Ekstra verantwoordelikhede om na te kom. Wanneer ons nader beweeg aan die lig, word ons ongeregthede duideliker. Tog is die antwoord nie wegvlug of 'n skynbekering en skynheiligheid nie. Nee, dit is ook duidelik in die lig dat ons die genade van die verlossing in ons Here Jesus Christus ervaar. In ons teksvers roep die Here ons vandag terug. Die beloftes van die einde van sy toorn is ook ons s'n in die verlossing in ons Here Jesus Christus vandag.

Sing: Psalm 116-1:1, 2, 3

Ds. FR (Franscois) Pretorius (Middelburg TVL)